

SC Mareo - ACD Val Badia

Inviato da Usc di Ladins

Ultimo aggiornamento domenica 26 agosto 2018

Domènia, 08. aurì 2018

La fortuna é sön la pert dl Mareo

Da na gran culissa de spetadus, á le Mareo davagné le derby ladin cuntra la Val Badia, segnan n gol al 95^{menüt}. En domènia dan otedé é gnü soghé sön le ciamp d'Al Plan le derby danter le Mareo y la Val Badia. Tratan che le Mareo se sogá n post tla pert alta dla classifica, é la Val Badia che adora vigni punt por se salvé y ne tomé nia jö te terza categoria.

La squadra dla Val Badia é ince chëra che mët man miú la partida y druca le Mareo dassënn te so mezciamp. Plü gonot vëgn i ghesch prigorusc y al 9^{menüt} i garatel ince le gol dl vantaje. Robert K. perd n palé a mez ciamp, Matthias Stampfer pó jí cuntra porta y cun na bela trata dal limit dl'area é bun da segné le gol dal 0 a 1 por i ghesch.

Sön chësta é le publich de ciasa che s'aspeta na reaziun da pert dl Mareo, mo baldi ne i garatel ai sogadus nia les sogades plü saurides y ai fej tröc dai banai. Al 29^{menüt} é indo i patrums de ciasa che perd n palé a mezciamp, mo la concujiun di ghesch vá de püch dlungia porta ia. Do chësta ocasiun, olache la Val Badia ess podü segné le gol dl 0 a 2, é i sogadus de ciasa che s'indespra plan plan. Al 31^{menüt} é Robert K. che vá su cuntra porta, René vëgn fora y do la trata de Robert é le portier avversar che rodosa le sogadú dl Mareo. L'arbitr ne bazila nia y ti mostra la cöcena. Insciö resta la Val Badia ma plü de 10. Do chësta espulsiun ne se lascia i ghesch nia trá jö y sogá inant cun gran convinziun. Al 45^{menüt} i garatel n cuntrapé ai ghesch, mo le palé vá ince te chësta ocasiun püch dlungia porta ia.

Le pröm tēmp se röia sön le 0 a 1 por la Val Badia, che á soghé cun plü convinziun y orenté da davagné, mo n'á nia anunzé val' bona ocasiun. Le Mareo n'é indere nia plü da conësce y pó ester contēt da ne s'avëi nia ciafé n gol implü. Le secundo tēmp vëgn indere dominé dala squadra de ciasa. Do le discurs dl alenadú é i sogadus dl Mareo jüs te ciamp de jüch cun plü convinziun y orenté da porté ciamó a ciasa na devēta. Al 51^{menüt} i garatel insciö al Mareo le gol dl pér. Do na bela combinaziun danter Lukas y Robert K. é chësc che röia dan porta y cun na bela trata bassa é bun da segné le gol dl 1 a 1. La ligrëza pai sostignidus y sogadus de ciasa é grana y do chësc gol ési ince bogn da soghé cun plü tranquilité. Al 62^{menüt} é le Mareo che ciafa na puniziun dal limit dl'area. Paulo crossëia le palé t'area, n sogadú dla Val Badia röia por prüm söl palé de ce, mo al spizorëia la cogora sön stangia de porta; chësta röia sön le pe de Lukas, mo súa trata vá de püch dlungia porta ia.

Cina ala fin ne sozedel nia plü cis tröp. La squadra de ciasa sogá deplü le palé y i ghesch se stlúj bun iadado. Canché düc mina che la partida sides rovada söla parité, é ciamó le Mareo che ciafa al ultim menüt na puniziun dal limit dl'area. Ince chiló é Paolo che crossëia le palé alt cuntra porta. Le portier avversar é bun da devié le palé sön stangia de porta; le plü asvelt lassura é Walter P., che é bun de cé da spizorëia le palé te porta por le gol dl 2 a 1 final. Do chësc gol é l'arbitr che sciüra la fin dla partida.

Le Mareo se porta a ciasa, cun na gran fortuna, trëi punc fundamentai por se soghé le terzo post te classifica. La Val Badia mëss indere cun gran desfortüna s'un jí a ciasa a mans ötes, y romagn insciö tla pert cialda dla classifica (pdp).

SC Mareo - ACD Val Badia: 2 - 1

Formaziun dl Mareo: 1. Luca Massa, 2. Walter Pischling, 3. Ivan Mutschlechner (dal 80[^] Elias Hochwieser), 4. Alan Erlacher (dal 46[^] Ivan Irsara), 5. Gabriel Frenner - capitan, 6. Davide Moling (dal 46[^] Alessandro Ties), 7. Robert Kanetscheider, 8. Thomas Castlunger, 9. Lukas Hochwieser, 10. Paolo Peixoto, 11. Jaco Trebo (dal 64[^] Pius Ploner). Alenadú: marco Mutschlechner.

Formaziun dla Val Badia: 1. René Ferdigg, 2. Florian Barbolini, 3. Mattia Klastlunger (dal 62[^] Andrea Conrater), 4. Christian Granruaz, 5. Giacomo Sibillon, 6. Gianluca Lorenzini, 7. Alex Felder, 8. Alex Stampfer, 9. Davide Fontanive (dal 80[^] Fabian Dalpiano, 10. Matthias Stampfer - capitan (dal 77[^] Alexander Ploner), 11. Nicola Zuliani (dal 33[^] Alfonso Caso).

Alenadù: Cristian Curti.

Gol por la Val Badia: Matthias Stampfer (al 10[^]).

Goi por le Mareo: Robert Kanetscheider (al 51[^]), Walter Pischling (al 95[^]).